

四庫全書

集部

欽定四庫全書

集部

御訂全金詩增補中州集卷六十五

詳校官中書

臣張虎拜

主事銜

臣徐以坤覆勘

總校官編修

臣

王燕緒

校對官編修

臣

勵守謙

謄錄監生

臣

黃嘉績

欽定四庫全書

御訂全金詩增補中州集卷六十五

元好問三

天門引

秦王宮中

一作深居

不得近從破衡成欲誰信白頭遊客困

咸陽顚顚黃金百斤盡海中仙人黃鶴

一作鵠

舉大笑人

間爭腐鼠丈夫何意作蘇秦六印才堪警兒女古來多

為虛名老不見阿房淨如埽千年虎豹守天門一日牛

羊臥秋草

蛟龍引

古劒咸陽墓中得挾開青雲見白日蛟龍地底氣如虹
土花千年不敢蝕洪鑪烈焰初騰精橫海已覺無長鯨
世上元無倚天手匣中誰解不平鳴割城恨不逢相如
行酒恨不逢朱虛尚方未入朱雲請盟盤合與毛生俱
誰念田文坐中客只將彈鋏歎無魚

湘夫人詠

木蘭芙蓉滿芳洲白雲飛來北渚游千秋萬歲帝鄉遠
雲來雲去空悠悠秋風秋月沅江渡波上寒煙引輕素
九疑山高猿夜嘯竹枝無聲墮殘露

孤劍詠

鬱鬱重鬱鬱夜半長太息吟成孤劍詠門外山鬼泣清
霜稜稜風入骨殘月耿耿燈映壁君不見一飢縛壯士
僵臥時自惜黃鵠一舉摩蒼天時念樊籠束脩翼

渚蓮怨

阿嬌何許來素面浣風雨寂寞煙中魂依依欲誰語

芳華怨

娃兒十八嬌可憐亭亭裊裊春風前天上仙人玉為骨
人間畫工畫不出小小油壁車軋軋出東華金縷盤雙
帶雲裾踏鴈沙一片朝雲不成雨被風吹去落誰家少
年豈無恩澤侯金鞍繡帽亦風流不然典取鷓鴣裘四
壁相如堪白頭金谷樓臺悄無主燕子不來花著雨只
知環珮作離聲誰向琵琶得私語無情鷓鴣翡翠兒有

情蜂雄蛺蝶雖勸君滿酌金屈卮明日無花空折枝

後芳華怨

江南破鏡飛上天三五二八清光圓
宣知汴梁破來一千日寂寞菱花仍半邊
白沙漫漫車轆轤鷓鴣絃中杜鵑哭塞門
顛顚人不知枉為珠娘怨金谷樂府初唱娃
兒行彈棋局中心不平只今雄蜂雌蝶兩不死
老眼天公如有情白玉搔頭綠雲髮玫瑰面
脂透肉滑春風著人無氣力不必相思解銷骨
落花絕品姚家黃揚州銀

紅一國香千園萬繞看不足雨打風吹空斷腸丹砂萬
年藥金印九一作州督不及秦宮一生花裏活長門曉
夕壽相如儘著千金買消渴

結楊柳怨

長樂坡前一

一作百

杯酒鄭重行人結楊柳可憐楊柳千

萬枝

一作條

看看盡入行人手輕煙細雨綠相和惱亂春

風態度多路人愛是

一作此

風流樹無奈朝攀暮折何朝

攀暮折何時了不道行人暗中老素衣今日洛陽塵白

髮明朝塞城草柳色年年歲歲青闕人何事管離情春
風誰向丁寧道折斷一作長條莫再生一作柔一作垂

秋風怨

碧瓦高梧響疎雨坐倚薰籠時獨語守宮一著死生休
狗走雞飛莫為女雲間簫鼓夜厭厭禁漏誰將海水添
一春門外羊車過又見秋風拂翠簾總把丹青怨延壽
不知猶有竹枝鹽

歸舟怨

渡頭楊柳青復青
閨中少婦動離情
只從問得狂夫處
夜夜夢到洛陽城
南風吹櫓聲北鴈鳴
嚶嚶江流望不極
相思春草生

征人怨

瀚海風煙埽易空
玉關歸路幾時東
塞垣可是秋寒早

一夜清霜入一作滿鏡中

塞上曲

平沙細草散羊牛
幾一作一簇征人在戍樓
忽見隴頭新

鴈過一時回首望南州

西樓曲

游絲落絮春漫漫西樓曉晴花作團樓中少婦弄瑤琴
一曲未終坐長歎去年與郎西入關春風浩蕩隨金鞍
今年疋馬妾東還零落芙蓉秋水寒并刀不剪東流水
湘竹年年淚一作露痕紫海枯石爛兩鴛鴦只合雙飛便
雙死重城車馬紅塵起乾鵲無端為誰喜鏡中獨語人
不知欲插花枝淚如洗

後平湖曲

越女顏如花吳兒潔如玉天教竝牆居不著同被宿美人一笑千黃金連城不博百年心樓上牆頭無一物暮爨朝舂一生足秋風拂羅裳秋水照紅妝舉頭見郎至低頭采蓮房郎心只如菱刺短妾意未覺藕絲長與郎期何許眼礙同舟女春波澹澹無盡情雙星盈盈不得語十里平湖艇子遲岸花汀草伴人歸鴛鴦驚起東西去惟有蜻蜓接翅飛

長安少年行

黃衫少年如玉立，生長侯門人不識。
道逢豪客問姓名，袖把金鞭側身揖。
卧馳行橐錦帕蒙，石榴壓漿銀作筒。
八月蒼鷹一片雪，五花驕馬四蹄風。
日暮新豐原上獵，三更歌舞灞橋東。

黃金行

贈王飛伯

王郎少年詩境新，氣象慘澹含古春。
筆頭仙語復鬼語，只有溫李無他人。
天公著詩貧子身，子曾不知乃自神。

人間不買詩名用一片青衫衡霍重兒貧女富母兩心
何論同袍不同夢入門喚婦不下機淚子垢面兒啼饑
君詩只有貧女謠何曾夢見金縷衣外家翁媪日有語
嫁女書生徒爾為昆陽城下三更酒醉膽輪困插星斗
一夕一作昔詩腸老蛟吼十尺長人墮車走斫頭不屈三
萬言欲向何門復低首何人壽我黃金千使君破鏡飛
上天

隋故宮行

渭川楊柳先得春二月鶯囀百轉新長春宮中千樹錦
暖日晴雲思殺人君王半醉唱吳歌絳仙起舞頰翠蛾
吳兒漫說曾行樂三十六宮能幾多千秋萬古金銀闕
海沒三山一毫髮繁華夢覺人不知留得寒蜚泣秋月

解劍行

古劍黑於漆鬱鬱動星文摩挲二十年今日持贈君長
鯨鼓浪三山沒知君不是泥中物袖間一卷白猿書未
分持刀買黃犢壯懷風雲鬱沈沈慚媿漂母無千金長

安侏儒飽欲死萬古不解天公心北風浩浩吹行客隴
水無聲雪花白荆卿墓頭秋草乾擊筑行歌欲誰識君
不見秦相五羖皮去時烹雞吹戾戾又不見敝裘蘇李
子合從歸來印累累丈夫墮地自有萬里氣翕忽變化
安能知大冠如箕望吾子富貴同生亦同死

征西壯士謠

三十未有二十強手內蛇矛丈八長總為官家金印大
不怕百死向沙場捉却賀蘭山下賊金鞍繡帽好還鄉

望雲謠

涉江采芙蓉芙蓉待秋風登山采蘭若蘭若霜早彫美
人亭亭在雲霄鬱搖行歌不可招湘絃沈沈寫幽怨愁
心歷亂如曳繭金支翠蕤紛在眼春草迢迢春波遠

望歸吟

塞雲一抹平如截塞草離離卧榆葉長城窟深戰骨寒
萬古牛羊飲冤血少年錦帶佩吳鉤獨騎疋馬覓封侯
去時只道從軍樂不道關山空白頭北風吹沙雜飛雪

弓絃有聲凍欲折寒衣昨夜洛陽來腸斷空閨擣秋月
年年歲歲望還家此日歸期轉未涯誰與南州問消息
幾時重拜李輕車

梁園春五首

車駕遷汴
京後作

軍從南去三回勝雪自冬來二尺強今歲長春多樂事

內家應舉萬年觴

長春德陵
誕節名

暖入金溝細浪添津橋楊柳綠纖纖賣花聲動天街遠

幾處春風揭繡簾

上苑春濃晝景閒
綠雲紅雪擁三山
宮牆不隔東風斷
偷送天香到世間

樓觀沈沈細雨中
出牆花木亂青紅
朱門不解藏春色
燕宿鶯啼處處通

雙鳳簫聲隔綵霞
宮鶯催賞玉谿花
誰憐麗澤門邊柳
瘦倚東風望翠華

龍德宮有五谿館
麗澤燕都西門名

探花詞三首

禁裏蒼龍啓九關
殿前鸚鵡喚新班
沈沈綠樹鞭聲遠

嫋嫋薰風扇影閒

浩蕩春風入繡鞍可憐東野一生寒
皇州花好無人管
不用新郎走馬看

六十人中數少年風流誰占探花筵
阿欽正使才情盡

猶欠張郎白玉鞭

李欽用二十七張夢祥少一歲又未婚云

獵城南

翩翩游俠兒白馬如疋練
朝出城南獵莫趁軍中宴
北平有真虎愛惜腰間箭

春風來

春風來時瑤草芳
綠池珠樹宿鴛鴦
春風去後瑤草歇
來鴻去鴈遙相望
鴛鴦不得雙燕鴻
天一方娟娟愁睂色
靜與遙山長錦衾
復羅薦夢語相思
怨月明烏夜啼空
閨淚如霰

并州少年行

北風動地起天際
浮雲多登高一長嘯
六龍忽蹉跎我
欲橫江鬪蛟鼉
萬弩迸射陽侯波
或當大獵燕趙間
黃

熊朱豹皆遮羅男兒萬馬隨撓訶朝發細柳暮朝那埽
雲黑山布陽和歸來明堂見天子黃金橫帶冠我我人
生只作張騫傳介子遠勝僵死空山阿君不見并州少
年夜枕戈破屋耿耿天垂河欲眠不眠淚滂沱著鞭忽
記劉越石拔劍起舞雞鳴歌東方未明兮奈夜何

續小娘歌十首

吳兒沿路唱歌行十五五和歌聲唱得小娘相見曲
不解離鄉去國情

北來游騎日紛紛
斷岸長隄是陣雲
萬落千邨藉不得
城池留著護官軍

山無洞穴水無船
單騎驅人動數千
直使今年留得在
更教何處避明年

青山高處望南州
漫漫江水遶城流
願得一身隨水去
直到海底不回頭

風沙昨日又今朝
踏碎鵝頭路更遙
不似南橋騎馬日
生紅七尺繫郎腰

鴈鴈相送過河來人歌人哭鴈聲哀鴈到秋來却南去
南人北渡幾時回

竹溪梅鴈靜無塵二月江南煙雨春傷心比日河平路
千里荆榛不見人

太平婚嫁不離鄉楚楚兒郎小小娘三百年來涵養出
却將沙漠換牛羊

饑鳥坐守草間人青布猶存舊領巾六月南風一萬里
若為白骨便成塵

黃河千里扼兵衝，虞虢分明在眼中。為向淮西諸將道，

不須誇說蔡州功。

此為宋助攻
蔡州而發

懷益之兄

世故伊川歎鄉情，越客音天宜他日定。陸已向來沈冉冉，
愁看老源源事益侵誰。言易排遣自分不勝任，鞭影
驚疲馬。鐘聲急暮禽，跼中無曠迹。喧外有幽尋，夢失名
家筆。書存遺子金山田，和石瘦茅屋過雲深。春雨蔬成
圃，秋霜柿滿林。樹陰涼拂席，花氣澹盈襟。宿鷺窺晨汲，

孤猿伴暝吟溪僧時問字野客或知琴抱璞休奇售臨

觴得緩斟阿

一作同

兄團聚日曾語

一作話

百年心

汴禪師自斲普照石

一作瓦

為斲以詩見餉為和二

首

寺廢瓦不毀研奇功亦多已知良斲少更奈苦心何挺

挺剛無敵津津潤可呵羽陽陵谷變冰井字書訛贈比

黃金璞辭慙紫石歌遙知玉音在洗耳俟研磨

長吉有紫石研

歌

點化鉛仍見堅凝鐵易穿何年埋朽壤此日睹青夫古
色秋煙重哀音夜雨懸有刀堪切玉是鏡不名甄佛蔭
淪空劫書林結後緣禪河一勺水更擬就師傳

癸巳除夜

鼎定周元重薪安漢已然不隨南渡馬虛泛北歸船身
竝枯蜩化心爭脫兔先塵埃嗟落泊光景強留連往事
青燈裏浮生白髮前更殘鐘未動猶屬出京年

病中

病因食豬動氣而作癸卯
四月二十一日晨起書

戰勝頗自恃寧知從外腴文章工作崇時運迫摧枯止
酒嗟何及燒豬本不圖膏粱無急變山澤有真臞詩信
藤條戲方遭鐵彈誣鹽去聲紅忘後顧鰲黑見前驅眩入
投牀仆晨淹伏枕呼萬錢惟嘔泄一嚮爾乘除靜伏心
仍悸深調息亦麤跼嫌囚宇宙渴憶卷江湖風柳留蟬
蛻霜松映鶴孤養和懲往失凡名養和事見天隨子詩扶老念時須
杯杓歸神誓垣牆任佛踰回溪且垂翅望或在桑榆

老樹

老樹高留葉寒藤細作花沙平時泊鴈野迴已攢鴉旅
食秋看盡行吟日又斜干戈正飄忽不用苦思家

陽翟道中

長路伶俜裏羈懷蒼莽中千山分晚一作落照萬籟入秋

風頻見參旗縮虛傳朔幕空故園歸未得細問北來鴻

太室同希顏賦

壯矣崧維嶽盤盤上窅冥中天瞻巨鎮元氣有遺形雨
入秦川黑雲開楚岫青鼇掀一柱在萬古壓坤靈

送登封張令西上

罷縣人稱屈悠悠復此行渭城秋鴈到秦嶺暮雲平
道路衣從典風塵劍已鳴山西多俠客莫說是書生

送曹吉甫兼及通甫

意氣羨君豪憐君屈騎曹安能事筆硯且復混弓刀
風雪貂裘暗關山馬骨高南飛見鴻鴈應為惜哀勞

勝槩

三鄉作

勝槩煙塵外新詩杖屨間偶隨流水去澹與暮雲還
吾

道三緘口時情一解顏從今便高卧已負半生閒

少室南原

地僻人煙斷山深鳥語譁清溪鳴石齒暖日長藤芽綠
映高低樹紅迷遠近花林間見雞犬直擬是仙家

落魄

落魄宜多病艱危更百憂雨聲孤館夜草色故園秋行
役魚鱗尾歸期烏白頭中州遂南北殘息付悠悠

長壽新居

同仲經賦

地古邨墟迴川迴縣郭斜蒲池餘老節菊水引去聲新芽

卜築欣成趣歸耕覺有涯迎門顧兒女今日是山家

十二月六日二首

張鬼跳梁久羣雄結構牢天機不可料世網若為逃白骨丁男盡黃金甲第高閭門隔九虎休續楚臣騷

海內兵猶滿天涯歲又新龍移矢魚鼈日食鬪麒麟草棘荒山雪煙花故國春聊城今夜月愁絕未歸人

短日

短日磴聲急重雲鴈影深風霜侵晚節天地入歸心零
落溝中斷酸嘶繫下音五年朝與夕清血幾沾襟

送楊次公兼簡秦彥容李天成

海國山如染雲堆草易荒時危頻虎穴路絕更羊腸弔
影雙蓬鬢攜家一藥囊殷勤秦與李無惜借餘光

倪莊中秋

己亥

強飯日逾瘦袂衣秋已寒兒童漫相憶行路豈知難露
氣入茅屋溪聲喧石灘山中夜來月到曉不曾看

陽興砦

亂石通樵逕，重岡擁戍城。山川帶淳朴，雞犬見升平。雨
爛沙仍軟，秋偏氣自清。年年避營馬，幾向此中行。

由州府

避騎兵奪馬者多由此路

聚仙臺夜飲

永夜留歡席，高懷遠市塵。月涼衣有露，風細酒生鱗。鄉
社情親舊，仙臺姓字新。殷勤詩卷在，長記座中人。

九月晦日王邨道中

水涸沙仍濕霜餘草更幽
煙光藏落景山骨露清秋
坐食知何益行吟只自愁
隨陽見鴻鴈三歎惜淹留

十月四日往關南

行役見新月獨行還獨謠
勞生塵袞袞晚色鬢蕭蕭
野曠無遺穗林疎有墮樵
回頭麥山嶺更覺馬蹏遙

和仲梁

林影兼秋薄雲陰帶晚涼
石潭魚近藻沙渚鴈留

一作含

霜笑語無長路登臨豈異鄉
一罇堪共醉惜不是重陽

感事

壯事本無取老謀何所成人皆傳已死吾亦厭餘生
潦倒封侯骨淹留混俗情百年堪一笑辛苦惜虛名

同冀文明秀山行

暮景披橫幅山間二老同雲如愁戍苦雪亦笑詩窮
古木凍欲折斷崖行復通從今胡谷夢時到水聲中

庚子三月十日作

殘夢忘書帙餘寒殢酒杯青銅元嬾照白紵更寬裁
水

際時獨往花邊知幾迴殷勤雙語燕應自謝家來

八月并州鴈

三鄉
時作

八月并州鴈清汾照旅羣一聲驚晚笛數點入秋雲滅
沒樓中見哀勞枕畔聞南來還北去無計得隨君

甲寅十二月四日出鎮陽寄宰魯伯

滹水曉光動灞橋詩境同衝寒騎瘦馬認影識衰翁長
路風聲裏孤城雪意中迴頭歌笑處淒絕意何窮

乙卯十一月往鎮州

邛靜鳥聲樂山低鴈影遙野陰時澠朗冷雨只飄蕭涉
遠心先倦衝寒酒易消紅塵忘南北渺渺見長橋

同姚公茂徐溝道中聯句

路轉川塗濶天低雨氣昏縣山連漢壘汾水入并門

姚

來往頻鞍馬登臨負酒罇聯詩強一笑淒絕恐銷魂

詠懷

崧山
中作

涼葉蕭蕭散雨聲虛堂淅淅掩霜清黃花自與西風約
白髮先從遠客生吟似候蟲秋更苦夢和寒鵲夜頻驚

何時石嶺關頭路一望家山眼暫明

帝城

史院夜直作

帝城西下望孤雲半廢晨昏媿此身世俗但知從仕樂
書生只合在家貧悠悠未了三千牘碌碌翻隨十九人
預遣兒書報歸日安排雞黍約比隣

僕射陂醉歸即事

多生曾得江湖樂每見陂塘覺眼明詩酒共尋前日
約風陰新自夜來晴春波澹澹沙鳥沒野色荒荒煙樹

平醉踏扁舟浩歌起不須紅袖出重城

是日招樂府不至

春日

里社春盤巧欲爭裁紅暈碧助春情忽驚此日仍為客
却想當年似隔生貧裏齏鹽憐節物亂來歌吹失懽聲
南州剩有還鄉伴戎馬何時道路清

歐陽詹春盤賦裁紅暈碧巧助春情

為韻

橫波亭為清口帥賦

孤亭突兀插飛流氣壓元龍百尺樓萬里風濤接瀛海

千年豪傑壯山丘
疎星澹月魚龍夜
老木清霜鴻鴈秋
倚劔長歌一杯酒
浮雲西北是神州

野菊座主閒閒公命作

柴桑人去已千年
細菊班班也自圓
共愛鮮明照秋色
爭教狼籍卧疎煙
荒畦斷壟新霜後
瘦蝶寒蛩晚景前
只恐春叢笑遲暮
題詩端為發幽妍

昆陽二首

古木荒煙集暮鴉
高城落日隱悲笳
并州倦客初投迹

楚澤寒梅又過花滿眼旌旗驚世路閉門風雪羨山家
忘憂只有清樽在暫為紅塵拂鬢華

去日黃花半未開南來忽復見寒梅淹留歲月無餘物
料理塵埃有此杯老馬長途良憊矣白鷗春水亦悠哉
商於說有滄洲趣早晚乾坤入釣臺

葉縣雨中

時崧前
旱尤甚

春旱連延入麥秋今朝一雨散千憂龍公有力迴枯槁
客子何心歎滯留多稼即看連楚澤歸雲應亦到崧丘

兵塵浩蕩乾坤滿未厭明河拂地流

潁亭

潁上風煙天地迴潁亭孤賞亦悠哉春風碧水雙鷗靜
落日青山萬馬來勝槩銷沈幾今昔中年登覽足悲哀

遠遊擬續騷人賦所惜怱怱無酒杯

三四二句又見張希孟會波樓詩

龍衰之病昔人亦不免耶

山中寒食

小雨班班浥曙煙平林簇簇點清川清明寒食連三月

潁水崧山又一年樂事漸隨花共減歸心長與鴈相先
平生最有登臨興百感中來只慨然

楚漢戰處

同欽叔賦

虎擲龍拏不兩存當年曾此賭乾坤一時豪傑多

一作皆

行陣萬古山河自壁門原野猶應厭膏血風雲長遣動
神魂成名豎子知誰謂擬喚狂生與細論

後灣別業

薄雲晴日爛烘春高柳清風便可人一飽本無華屋念

百年今見老農身
童童翠蓋桑初合
濫濫蒼波麥已勻
便與溪塘作盟約
不應重遣濯纓塵

寄欽用

顛顛京華苜蓿盤
南山歸興夜漫漫
長門有賦人誰買
坐榻無氍毹客亦寒
蟲臂偶然煩造物
麀頭何者亦求官
故人東望應相笑
世路羊腸乃爾難

內鄉縣齋書事

吏散公庭夜已分
寸心牢落百憂薰
催科無政堪書考

出粟何人與佐軍
饑鼠遶牀如欲語
驚鳥噓月不堪聞

扁舟未得滄浪去
慚媿春陵老使君

遠祖次山春陵行云思欲委符節引

竿自刺船故子美有興含滄浪清之句

被檄夜赴鄧州幕府

幕府文書烏羽輕
傲裘羸馬月三更
未能免俗私自笑
豈不懷歸官有程
十里陂塘春鴨鬧
一川桑柘晚煙平
此生只合田間老
誰遣春官識姓名

除夜

一燈明暗夜如何夢寐衡門在澗阿物外煙霞玉華遠
花時車馬洛陽多折腰真有陶潛興扣角空傳甯戚歌
三十七年今日過可憐出處兩蹉跎

劉光甫內鄉新居

薦冠平日凜秋霜老去聲名只閉藏父老漸來同保社
兒童久已愛文章蔬隨隙地皆成圃竹放新梢欲過牆
為向長安舊遊道世間元有北窓涼

西齋夜宴

時為內鄉令

飄零無物慰天涯酒伴相逢飲倍加
誤謬君當畧彭澤迴旋我亦笑長沙
金釵翠鞵迎春髻銀燭光搖半夜花
只欠東山游錄事不來堅坐看紛華

叔能信之張杜諸人皆在而麟之獨

不至

出山

松門石逕靜無闕布韞青鞵幾往還
少日漫思為世用中年直欲伴僧閒
塵埃長路仍回首升斗微官亦強顏
休道西山不留客數峯如畫莫雲間

石門

兩崖懸

一作橫

絕倚山垠草逕低迷劣可分潭影乍從明

處見竹香偏向靜中聞石林萬古不知暑茅屋四鄰惟有雲曳杖行歌羨樵叟此生何計得隨君

岐陽三首

突騎連營鳥不飛北風浩浩發陰機三秦形勝無今古
千里傳聞果是非偃蹇鯨鯢人海涸分明蛇犬鐵山圍
窮途老阮無奇策空望岐陽淚滿衣

百二關河草木橫十年戎馬暗秦京岐陽西望無來信
隴水東流聞哭聲野蔓有情縈戰骨殘陽何意照空城
從誰細向蒼蒼問爭遣蚩尤作五兵

眈眈九虎護秦關懦楚孱齊机上看禹貢土田推陸海
漢家封檄自一作盡天山北風獵獵悲笳發渭水蕭蕭戰

骨寒三十六峰長劒在倚天仙掌惜空閒

雨後丹鳳門登眺

絳闕遙天霽景開金明高樹晚風迴長虹下飲海欲竭

老鴈叫雲

一作羣

秋更哀劫火有時歸變滅神寓何計得

飛來窮途自覺無多淚莫傷殘陽望吹臺

懷秋林別業

茅屋蕭蕭浙水濱
豈知身屬洛陽塵
一家風雪何年盡
二頃田園入夢頻
高樹有巢鳩笑拙
空牆無穴鼠嫌貧
西南遙望腸堪斷
自古虛名只誤人

壬辰十二月車駕東狩後即事五首

翠被忽忽見執鞭
戴盆鬱鬱夢瞻天
只知河朔歸銅馬

又說臺城墮紙鳶
血肉正應皇極數
衣冠不及廣明年
何時真得攜家去
萬里秋風一釣船

慘澹龍蛇日鬪爭
干戈真欲盡生靈
高原水出山河改
戰地風來草木腥
精衛有冤填瀚海
包胥無淚哭秦庭

并州豪傑知一作今誰在
莫擬分軍下井陘

鬱鬱圍城度兩年
愁腸饑火日相煎
焦頭無客知移突
曳足何人與共船
白骨又多兵死鬼
青山元有地行仙
西南三月音書絕
落日孤雲望眼穿

萬里荆襄入戰塵汴州門外即荆榛蛟龍豈是池中物
蟣蝨空悲地上臣喬木他年懷故國野煙何處望行人
秋風不用吹華髮滄海橫流要此身

五雲宮闕露盤秋銀漢無聲桂樹稠複道漸看連上苑
戈船仍擬下揚州曲中青冢傳新怨夢裏華胥失舊遊
去去江南庾開府鳳凰樓畔莫迴頭

癸巳四月二十九日出京

塞外初捐宴賜金當時南牧已駸駸只知灞上真兒戲

誰謂神州竟

一作送

陸沈華表鶴來應有語銅鑾人去亦

何心興亡誰識天公意留著青城閱古今

國初取宋於青城受降

喜李彥深過聊城

圍城十月鬼為鄰異縣相逢白髮新恨我不如南去鴈
羨君獨是北歸人言詩匡鼎功名薄去國虞翻骨相屯
老眼天公只如此窮途無用說悲辛

與張杜飲

故人寥落曉天星異縣相逢覺眼明世事且休論向日

酒樽聊喜似承平
山公倒載羣兒笑
焦遂高談四座驚
轟醉春風一千日
愁城從此不能兵

秋夕

小簾涼多睡思清
一窓風雨送秋聲
頻年但覺貂裘敝
萬古何曾馬角生
寄食且依嚴尹幕
附書誰往鄧州城
洗一作澆愁欲問東家酒
恨殺寒雞不肯鳴

夢歸

顛顚南冠一楚囚
歸心江漢日東流
青山歷歷鄉國夢

黃葉蕭蕭風雨秋貧裏有詩工作祟亂來無淚可供愁
殘年兄弟相逢在隨分壘鹽萬事休

淮右

淮右城池幾處存宋州新事不堪論輔車漫欲通吳會
突騎誰當擣薊門細水浮花歸別澗斷雲含雨入孤邨

空餘韓偓傷時淚

一作語

留與累臣一斷魂

五六全用韓致光語即於

結聯標出自成一體遺山詩用前人成語極多陶杜句尤甚又未可以此例槩之也

秋夜

九死餘生氣息存蕭條門巷似荒邱春雷漫說驚坏戶
皎日何曾入覆盆濟水有情添別淚吳雲無夢寄歸魂
百年世事兼身事樽酒何人與細論

附金詩紀事案此詩為汴京之難言之也金史
文藝傳云天興二年春崔立之變羣小附和請為
立建功德碑翟奕以尚書省命召翰林直學士
王若虛為文時奕輩恃勢作威人或少忤則橫
遭讒構立見屠滅若虛自分必死以理諭之奕

輩不能奪乃召太學生劉祁麻革輩赴省元好
問張信之喻以立碑事曰衆議屬二君且已白
鄭王矣二君其無讓祁等固辭而別數日促迫
不已祁即為草定以付好問好問意未愜乃自
為之既成以示若虛乃共刪定數字則當時碑
文皆以為裕之所作其不免於物議可知詩中
悲啣坏戶冤抱覆盆傷九死之餘生慨百年之
身世曹聽耳食實繁有徒樽酒細論所以歎息

於告語之無人也然意含蓄未露其痛切言之者則見於集中外家別業上梁丈及元郝經伯常辨磨甘露碑詩並錄於後以備攷

附外家別業上梁丈云窮於途者返於家乃人情之必至勞以生而佚以老亦天道之自然方屬風霜偃薄之餘而有里社浮湛之漸茲焉卜築今也落成遺山道人蟬蠹書癡雞蟲祿薄猥以勃窣槃跚之跡仕於危急存亡之秋左曹之

斗食未遷東道之戈船已御久矣公私之俱罄
困於春夏之長圍窮甚析骸死惟束手人望荆
兄之通好義均紀季之附庸出涕而女於吳莫
追於既往下車而封之杞有覲於方來謀則僉
同議當就抗爰自上書宰相所謂試微軀於萬
仞不測之淵至於喋血京師亦常保百族於羣
盜垂涎之口皇天后土實聞存趙之謀枯木死
灰無復哭秦之淚初一軍搆亂羣小歸功劫太

學之名流文鄭人之逆節命由威制佞豈願為
就磨甘露御書之碑細刻錦溪書叟之筆蜀家
降欵具存李昊之世修趙王禪文何預陸機之
手迹伊誰受賞於我嫁名悼同聲同氣之間有
無罪無辜之謗耿孤懷之自信聽衆口之合攻
果吮癰舐痔之自甘雖竄海投山其何恨惟彼
證龜而作鼈始於養虺以成蛇追韓之騎甫還
射羿之弓隨殼

予北渡之初獻書中令君請以一寺觀所費養天下名士造謗

二三亦書中
枚舉之類也以流言之自止知神理之可憑復

齒平民僅延殘喘澤畔而湘纍已老樓中而楚

望奚窮懷先人之敝廬可憐焦土眷外家之宅

相更愧前途豈謂事有幸成計尤私便東諸侯

助竹木之養王錄事寄草堂之貲占松聲之一

丘東臯子北山賦菊
花兩岸松聲一丘近桃花之三洞予此別業
與白子西

所居
相近東牆西壁無補圻之勞上雨旁風有閉藏

之固已與編戶細民而雜處敢用失侯故相而

自名因之挫銳以解紛且以安常而處順老盆
濁酒便當接田父之歡春韭晚菰尚媿奪園夫
之利彼扶搖直上擊水三千韋杜城南去天尺
五坐廟堂佐天子蓋有命焉使鄉里稱善人斯
亦足矣

附金詩紀事案文中云左曹之斗食未遷時裕
之尚官左司都事其後梁王監國始遷左右司
員外郎也東道之戈船已御時天興元年春元

兵已駐鄭州海灘寺進攻汴京也圍城數月外
援莫至珠紳乞和額爾克出質請罷攻而不得議
親捍而大奔車駕蒙塵輿情無主衆欲推立荆
王守純以城降元如春秋紀季入齊之義所謂
人望荆兄之通好義均紀季之附庸也其時裕
之實請於珠紳與阿巴欲立監國以全兩宮與
皇族翌日而乃有崔立之變二相被殺故有上
書宰相喋血京師存趙有謀哭秦無淚之歎也

至云劫太學之名流丈鄭人之逆節似乎當時
碑丈仍出劉京叔手苟如史所云好問意未愜
乃自為之則安得復云蜀家降款具存李昊之
世修趙王禪文何預陸機之手迹耶慨受賞者
有人悲嫁名為無罪乍返追韓之騎已闕射羿
之弓其言隱痛必有所指注中所云造謠二三
者俟更考之

附金詩紀事案注中所云中令君蓋耶律楚材

也楚材為右丞文獻公履之第三子仕元為中書令裕之獻書即在癸巳歲之四月於金為天興二年於元為太宗之五年時汴京變後南中大夫士歸河朔者所在有之故裕之寓書楚材請以一寺觀費養天下名士也書中所枚舉者自耆舊如馮內翰叔獻梁都運斗南高戶部唐卿王延州從之四人外時輩為平陽王狀元綱東明王狀元鶚濱人王賁臨淄人李浩秦人張

徽楊煥然李庭訓河中李獻卿武安樂夔固安
李天翼沛縣劉汝翼齊人謝良弼鄭人呂大鵬
山西魏璠澤人李恒簡李禹翼燕人張聖俞太
原張緯李謙冀致君張耀卿高鳴孟津李蔚真
定李冶相人胡德珪易州敬鉉雲中李微中山
楊果東平李彥西華徐世隆濟陽張輔之燕人
曹居一王鑄渾源劉祁及其弟郁李全平定賈
庭揚楊恕濟南杜仁傑洺水張仲經虞鄉麻革

東明商挺漁陽趙著平陽趙維道汝南楊鴻河
中張肅河朔勾龍瀛東勝程思溫及其從弟思
忠共四十九人內劉麻二人之名皆在焉然則
所云造謗二三得毋即指之耶但裕之與信之
素厚內鄉隱居河汾投老始終未嘗有間京叔
父子兄弟其始亦極為裕之所推許即晚歲輯
中州集時論次雲卿蓬門先生集中詩尚云二
子祁郁俱有名於時未聞有所譏貶如文中養

虺成蛇殼弓射羿何甚也然猶稱之曰名流不
深斥其人也諉之曰刼明其非得已也復為之
解曰命由威制則又似乎京叔之撰文翟奕張
信之輩實使裕之促之者更為之解曰佞豈願
為又似乎京叔屬草既定之後裕之亦嘗畧為
刪改者後乃盡舉其過歸之一人是以悼同聲
同氣之間有無罪無辜之謗也

附陵川集郝經辨磨甘露碑云國賊反城自為

功萬段不足仍推崇勒文誦德召學士滹南先生付一死林希更不顧名節兄為起草弟親刻省前便磨甘露碑書丹即用宰相血百年涵養一塗地父老來看閣流涕數樽黃封幾斛米賣却家聲都不計盜據中國責金源吠堯極口無覲顏作詩為告曹聽翁且莫獨罪元遺山

附金詩紀事按遺山集內翰王公墓表云天興初冬十二月車駕東狩明年春正月京城西面元

帥崔立刼殺宰相送欵行營羣小獻諂請為
立建功德碑以都堂命召公為文喋血之際崔
奕輩恃勢作威頤指如意人或少忤則橫遭讒
構立見屠滅公自分必死私謂好問言今召我
作碑不從則死作之則名節掃地貽笑將來不
若死之為愈也雖然我姑以理諭之乃謂奕輩
言丞相功德碑當指何事為言奕輩怒曰丞相
以京城降城中人百萬皆有生路非功德乎公

又言學士代王言功德碑謂之代王言可乎
且丞相既以城降則朝官皆出丞相之門自古
豈有門下人為主帥誦功德而為後人所信者
問答之次辭情閒暇奕輩不能奪竟脅太學生
託以京城父老意而為之則碑文之出於劉京叔
手可知伯常詩中勒文誦德召學士淳南先生
付一死謂王從之能顧名節也林希更不顧名
節兄為起草弟親刻豈於時京叔撰文其弟文

季亦在圍城中便為之上石耶書丹即用宰相
血傷珠紳阿巴之見殺也父老來看闔流涕明
非京城父老意也數罇黃封幾斛米即遺山上
梁文中所云受賞也賣却家聲都不計當以二
劉之高祖南山翁撫從曾祖西巖老人汲父御
史從益於金源氏百年以來世為高門今乃以
此墮其家聲為可惜也但林希二字殊不可解
或以麻字之減文為林信之自號貽溪復以貽

溪之反語為希耶信之為秉彞之孫亦有家聲
但與詩所云兄弟者不合或即為信之語以起
草讓京叔而以刻石自任耶末云作詩為告曹
聽翁且莫獨罪元遺山則所以為裕之訟冤者
雖切然亦未嘗謂不與其事者蓋裕之之自尚
書省掾左右司員外郎實為崔立所署其受謗
亦未為無因也

乙未正月九日立春

十度新正九處家今年癡坐轉堪嗟一冬殘雪不肯盡

連日苦陰

一作寒

殊未涯重碧總誇燕市酒小紅誰記上

林花殘魂零落今無幾乞與春風惱鬢華

甲午除夜詩云甲子兩周

今日盡空將衰淚灑吳天是時金已亡故也

三仙祠

三仙祠下往來頻顚顚征衫滿路塵簫鼓未休寒食酒

樵蘇時見舊都人吹殘芳樹紅仍在展放

一作破

平田綠

已勻西北并州隔千里幾時還我故鄉春

送輔之仲庸還大梁

驂騑爭道渺翩翩誰遣風塵失壯年
四壁舊聞懸磬宅一囊今有買書錢
淋浪一作滿別酒青燈夜滅沒孤帆落
照邇想得還家過春半故都一作山喬木滿蒼煙

眼中

眼中時事益紛然擁被寒窓夜不眠
骨肉他鄉各異縣衣冠今日是何年
枯槐聚蟻無多地秋水鳴蛙自一天
何處青山隔塵土一巷吾欲送華顛

寄欽止李兄

征車南北轉秋蓬
關塞相望兩禿翁
衮衮便當隨世路
悠悠難復倚天公
銅駝荊棘千年後
金馬衣冠一夢中
罇酒雲州古城下
幾時攜手哭春風

鎮州與文舉百一飲

翁仲遺墟草棘秋
蒼龍雙闕記神州
只知終老歸唐土
忽漫相逢一作看是楚囚
日月盡隨天北轉
古今誰見海西流
眼中二老風流在
一醉從教萬事休

衛州感事二首

神龍失水困蜉蝣一舸倉惶入宋州
紫氣已沈牛斗夜白雲空望帝鄉
秋劫前寶地三千界夢裏瓊枝十二樓
欲就長河問遺事悠悠東注不還流

白堦亭亭古佛祠往年曾此走京師
不知江令還家日何似湘纍去國時
離合興亡遽如此淒遲零落竟安之

太行千里青如染落日

一作獨凭

闌干有所思

望崧少二首

崧少飛來崑閬山山家茅屋翠微間雞豚鄉社相勞苦
花木禪房時往還結習尚餘三宿戀殘年多負半生閒
長河一葦人千里望斷西城碧玉環

飲鶴池邊萬木稠養龍崖上五峯秋藤垂絕壁雲添潤
澗落哀湍雪共流田父占年驚玉旆詩仙留迹歎崑丘
西風落日山陽道空對紅塵憶舊遊

飲鶴池在緱山養龍崖在五乳峯下

懷州子城晚望少室

河外青山展卧屏并州孤客倚高城十年舊隱拋何處

一片傷心畫不成
谷口暮雲知鄭重
林梢殘照故分明
洛陽見說兵猶滿
半夜悲歌意未平

羊腸坂

浩蕩雲山直北看
凌兢羸馬不勝鞍
老來行路先愁遠
貧裏辭家更覺難
衣上風沙歎顛顚
夢中燈火憶團圓
憑誰為報東州信
今在羊腸百八盤

太原

夢裏鄉關春復秋
眼明今得見并州
古來全晉非無策

亂後清汾空自流南渡衣冠幾人在西山薇蕨此生休
十年弄筆文昌府爭信中朝有楚囚

野谷道中懷昭禪師

行行汾沁欲分疆漸喜人聲挾兩鄉野谷青山空自繞
金城白堊已相望湯翻豆餅銀絲滑油點茶心雪蕊香
說向阿師應被笑人生生處果難忘

外家南寺

在至孝社予兒時讀書處也

鬱鬱秋梧動晚煙一庭風露覺秋偏眼中高岸移溪谷

愁裏殘陽更亂蟬去國衣冠有今日外家梨栗記當年
白頭來往人間徧依舊僧窓借榻眠

寄楊飛卿

客夢悠悠信轉蓬
藜牀殷動晨鐘
西風白髮三千丈
故國青山一萬重
沙水有情留過鴈
乾坤多事泣秋蟲
三間老屋知何處
慚媿雲間陸士龍

再到新衛

蝗旱相仍歲已荒
伶俜十口值還鄉
空令姓字喧時輩

不救饑寒趨路傍行帳馬嘶塵瀕洞空邛人去雨淋浪
河平千里筋骸盡更欲驅車上太行

別冠氏諸人

戊辰秋八月初二日

東舍茶渾酒味新西城紅豔杏園春衣冠會集今為盛
里社追隨分更新分手共傷千里別低眉常媿六年貧
他時細數平原客看到還鄉第幾人

四哀詩

李欽叔

赤縣神州坐陸沈
金湯非粟禍侵尋
當官避事平生恥
視死如歸社稷心
丈夫采是人知
子重交朋無我與
君深悲來不待山
陽笛一憶同衾淚
滿襟

冀京父

先公藻鑑識終童
曾拔崑山玉一峯
不見連城沽白壁
早聞烈火燎黃琮
重圍急變紛紛口
九地忠魂耿耿胸
欲弔南雲無覓處
士林能不泣相逢

李長源

冀都事死東州禍李翰林亡陝府兵方為騷人箋楚些
更禁書客墮秦坑石苞本不容孫楚黃祖安能貸禰衡
同甲四人三橫實此身雖在亦堪驚

王仲澤

太學聲華弱冠馳青雲岐路九霄飛上前論事龍顏喜
幕下籌邊犬吠稀壯志相如頭碎柱赤心嵇紹血沾衣
從來聖牘褒忠義誰為幽魂一發揮

杏花

庚子歲
南巷賦

芳樹春融絳蠟凝春風寂寞掩柴荆畫眉盧女嬌無奈
鵲齒孫娘笑不成已怕宿妝添蝶粉更堪暖蕊鬧蜂聲
一般疎影黃昏月獨愛寒梅恐未平

賦南中楊生玉泉墨

墨不用松煙
而用燈煤

萬竈玄珠一唾輕客卿新以玉泉名御團更覺香為累
冷劑休誇漆點成浣袖秦郎無籍在畫眉張遇可憐生
晴窓弄筆人今老孤負松風入硯聲

宮中以張遇磨香
小團為畫眉墨

赤石

林罅陰崖霧杳冥石根寒溜玉玎玲雲來朔漠疑秋早
山近清涼覺地靈靜愛鳥聲存野調閑嫌人迹帶塵腥
南臺說有金銀氣可是并汾處士星

繫舟山僧徒謂之
小五臺九月中時

有景星如
佛光云

瀍亭同麻知幾賦

零落棲遲復此遊一罇聊得散羈愁天圓平野莽無際
水繞孤城閒不流

元是深字知幾
請予改作閒字

柳意漸迴淮浦暖鴈

聲仍帶塞門秋登高遠望令人起欲買煙波無釣舟

過應州

平野風埃接戍樓邊城三月似窮秋人生土屋纔容膝
驛路旂車不斷頭隨俗未甘嘗馬湏敵寒直欲御羊裘
十年紫禁煙花繞此日雲山是應州


感事

富貴何曾潤髑髏直須浙米向矛頭血讐此日逢三怨
風鑑生平備九流瓢飲不甘顏巷樂市鉗真有楚人憂
世間安得如川酒力士鎗頭醉死休

感興

夜宿讀
書山作

倚梯從昔望煙霄七葉何人竟珥貂
道路常教車輾轉功名唯有鬢飄蕭
勤如韓子初無補晚似馮公豈見招
五十三年等閒裏一窓風葉雨瀟瀟



御訂全金詩增補中州集卷六十五

欽定四庫全書

集部

御訂全金詩增補中州集卷六十六

詳校官中書_臣張虎拜

主事銜_臣徐以坤覆勘

總校官編修_臣王燕緒

校對官編修_臣勵守謙

謄錄監生_臣黃嘉績

欽定四庫全書

御訂全金詩增補中州集卷六十六

元好問四

出都二首

漢宮曾動伯鸞歌事去英雄可奈何但見觚稜上金爵
豈知荆棘臥銅駝神仙不到秋風客富貴空悲春夢婆
行過盧溝重回首鳳城平日五雲多

歷歷興亡敗局棋登臨疑夢復疑非斷霞落日天無盡

老樹遺臺秋更悲
滄海忽驚龍穴露
廣寒猶想鳳笙歸

從教盡刻瓊華了
留在西山儘淚垂

壽寧宮有瓊華島
絕頂廣寒殿近為

黃冠輩
所撤

甲辰三月旦日以後雜詩二首

澌澌猩紅鬧曉晴
攢頭真似與春爭
舒開楊柳聊相映
瘦殺寒梅枉自清
粉豔低徊工作態
絳脣寂寞獨含情
畫圖只愛殘妝好
未信徐郎解寫生

密霧輕塵細灑勻
綠雲紅雪一番新
風光爛漫供歡席

酒味清醇似主人
落落湖山如有喜
欣欣魚鳥亦相親
新詩寫入奚奴錦
從此他鄉不算春

紫牡丹

夢裏華胥失玉京
小闌春事自昇平
只緣造物偏留意
須信凡花浪得名
蜀錦浪淘添色重
御爐風細覺香清
金刀一翦腸堪斷
綠鬢劉郎半白生

洛陽

千年河嶽控喉襟
一日神州見陸沈
已為操琴感衰涕

更須同輦夢秋衾城頭大匠論蒸土地底中郎待摸金
擬就天公問翻復蒿萊丹碧果何心

為鄧人作詩

再見州人本不期相留相挽忍相違攜盤渭水空

一作堪

流涕種柳金陵已合圍事去恍疑春夢過眼明還似故
鄉歸題詩未要題名字今是中原一布衣

贈張主簿偉

江岸墳荒草棘秋朱陽南下重君憂弓刀近塞人煙少

林壑經霜虎迹稠，究竟畏途知有漸。
激昂高義報無繇，從今弟妹通家了。
莫向瓜田認故侯。戒為究竟伴能過險惡道

寄劉繼先

清霜茅屋耿無眠，坐憶分攜一慨然。
楚客登臨動歸興，謝公哀樂感中年。
淒涼古驛人煙外，迤邐荒山雪意邊。
千樹春風水楊柳，待君同繫晉溪船。

寄答商孟卿

窈渺朱絃寂寞心，得詩何啻得黃金。
冷猿掛夢山月暝，

老鴈叫羣江渚深異縣五年仍隔闊荒城連日想登臨
書來且只平安了撥觸離愁恐不禁

十一月五日暫住西張

城隈細路入沙汀絮帽衝風日再經歲歎村墟更荒惡
窮冬人影亦伶俜林煙漠漠鴉邊暗山骨稜稜雪外青
四十年來此寒苦凍吟猶記隴關亭

石嶺關書所見

軋軋旃車轉石槽故關猶復戍弓刀連營突騎紅塵暗

微服行人細路高已化蟲沙休自歎厭逢豺虎欲安逃
青雲玉立三千丈元只東山意氣豪

汴梁除夜

追錄

六街歌鼓待晨鐘四壁寒齋只病翁鬢雪得年應更白
燈花何喜亦能紅養生有論人空老祖道無詩鬼亦窮
數日西園看車馬一番桃李又春風

上聲

龍興寺閣

全趙堂堂入望寬九層飛觀儘高寒空聞赤幟疑軍壘

真見金人泣露盤
桑海幾經塵劫壞
江山獨恨酒腸乾
詩家總道登臨好
試就遺臺老樹看

聽姨女喬夫人鼓風入松

白雪朱絃一再行
春風纖指十三星
雲窓霧閣有今夕
寶靨羅裙無此聲
瀟灑寒松度虛籟
悠揚飛絮攬青冥
胎仙不比湘靈瑟
五字錢郎莫漫驚

寒食

王子清
明後作

上苑春風盛物華
天津雲錦赤城霞
輕舟矮馬追隨遠

翠幕青旗笑語譁化國樓臺隔瀛海吳兒洲渚記仙家
山齋此日腸堪斷寂寞銅瓶對杏花

送樊順之

弓刀十驛岳蓮州渭水秦山得意秋王粲從軍正年少
庾郎入幕更風流寒鄉況味真雞肋清鏡功名屬虎頭
寄謝溪風亭上月老夫乘興欲西遊

過寂通菴別陳丈

并序

陳丈未識某而愛其詩曾對高御史士美言我他日

見遺山當快飲百醉後見之而公已病乃相約易百
醉為百杯每見以酒籌計之至七八十杯復有此別

故詩中及之

甲辰
秋

心遠繇來地自偏不離城市得林泉從教上界多官府
且放閒身作地仙三月有期何敢負百杯未滿會須填
違離更覺從公晚却望都門一慨然

大明贈答張簡之

營平豪宕變溫文所見今知勝所聞只道生涯無長物

爭教詩壘策奇勲，伐薪未敢煩名士。
載酒能來過子雲。
後日山陽養衰疾，藥籠仙品正須君。

存沒

辛老敬之
劉兄景玄

行間楊趙提衡早，老去辛劉入夢頻。
案上酒杯聊自慰，袖中詩卷欲誰親。
兩都秋色皆喬木，一代名家不數人。
汲冢遺編要完補，可能虛負百年身。

人日有懷愚齋張兄緯文

書來聊得慰懷思，清鏡平明見白髭。
明月高樓燕市酒，

梅花人日草堂詩風光流轉何多態兒女青紅又一時
澗底孤松二千尺殷勤留看歲寒枝

張村杏花

丁巳三月初二日

昨日櫻桃

一作
櫻

絳蠟痕今朝紅袖已迎門只應芳樹知

人意留著殘妝伴酒罇濃李尚須羞粉豔寒梅空自怨
黃昏詩家元白無今古從此張村即趙村

送奉先從軍

潦倒書生百戰場功名都屬繡衣郎虎頭食肉無不可

鼠目求官空自忙卷月清笳渭城曉倚天長劒蜀山蒼
習池老去風流減醉後揚鞭媿葛疆

贈玉峯魏丈邦彥

夢想南山掩靄間眼明驚見玉峯寒風波舊憶橫身過
世事今歸袖手看販婦傭兒識名姓故鄉遺族見衣冠
臨流卜築平生事會就遼東管幼安

鬱鬱

鬱鬱羈懷不易開更堪寥落動淒哀華胥夢破青山在

梁甫吟成白髮催
秋意漸隨林影薄
曉寒都逐鴈聲來
并州舊日風聲惡
悵望鄉書早晚回

秋日載酒光武廟

美酒良辰邂逅同
赤眉城北漢王宮
百年星斗歸天上
萬古旌旗在眼中
草木暗隨秋氣老
河山長為昔人雄
一杯逕醉風雲地
莫放銀盤上海東

丙辰九月二十六日挈家遊龍泉

風色澄鮮稱野情
居僧聞客喜相迎
藤垂石磴雲添潤

泉漱山根玉有聲庭樹老於臨濟寺霜林渾是漢家營
明年此日知何處莫惜題詩記姓名

洛陽高少府瀍陽後菴四首

溪上弄明月風露發新警心空無一塵萬竹埽清影
一水隨人意蔬畦復芋溝風波河洛近莫放出山流
韭早春先綠松肥秋未黃殷勤繞畦水終日為君忙
地僻境逾靜林疎秋已分清溪一片月修竹四山雲

山居雜詩六首

瘦竹藤斜挂叢

一作幽

花草亂生林高風有態苔滑水無

聲

石潤雲先動橋平水漸過野陰添晚重山意向秋多
樹合秋聲滿村荒暮景閒虹收仍白雨雲動忽青山
川迴楓林散山深竹港幽疎煙沈去鳥落日送歸牛
漲落沙痕出堤摧岸口斜斷橋堆聚沫高樹閣浮槎
鷺影兼秋靜蟬聲帶晚涼陂長留積水川闊盡斜陽

梁父吟扇頭

孔明箕踞坐大石上望月作梁父吟

盤礴萬古心塊石入危坐青天一明月孤唱誰與和

辛亥寒食

寒食年年好今年迴不同秋千與花影并在月明中

德和墨竹扇頭

靜裏離離新粉動時細細清香明月清風自在紅塵白

日何妨

嫩香新粉墨離
離李長吉竹詩

曹得一扇頭

機中秦女仙去月底梅花晚開只見一枝疎影不知何

處香來

論詩三十首

丁丑歲
三鄉作

漢謠魏什久紛紜
正體無人與細論
誰是詩中疏鑿手
暫教涇渭各清渾

曹劉坐嘯虎生風
四海無人角兩雄
可惜并州劉越石
不教橫槊建安中

鄴下風流在晉多
壯懷猶見缺壺歌
風雲若恨張華少

溫李新聲奈爾何

鍾嶸評張華詩恨其
兒女情多風雲氣少

一語天然萬古新豪華落盡見真淳南窓白日羲黃上

未害淵明是晉人

柳子厚唐之謝靈運
陶淵明晉之白樂天

縱橫詩筆見高情何物能澆碗磊平老阮不狂誰會得
出門一笑大江橫

心畫心聲總失真文章寧復見為人高情千古閒居賦
爭信安仁拜路塵

慷慨歌謠絕不傳穹廬一曲本天然中州萬古英雄氣
也到陰山勅勒川

沈宋橫馳翰墨場風流初不廢齊梁論功若準平吳例
合著黃金鑄子昂

關靡誇多費覽觀陸文猶恨冗於潘心聲只要傳心了

布穀瀾翻可是難

陸蕪而潘靜
語見世說

排比鋪張特一途藩籬如此亦區區少陵自有連城壁

爭奈微之識玳瑁

事見元稹
子美墓志

眼處心生句自神暗中摸索總非真畫圖臨出秦川景

親到長安有幾人

望帝春心託杜鵑佳人錦瑟怨華年詩家總愛西崑好
獨恨無人作鄭箋

萬古文章有坦途縱橫誰似玉川盧真書不入今人眼
而輩從教鬼畫符

出處殊塗聽所安山林何得賤衣冠華歆一擲金隨重
大是渠儂被眼瞞

筆底銀河落九天何曾顚顚飯山前世間東抹西塗手
枉著書生待魯連

切切秋蟲萬古情
燈前山鬼淚縱橫
鑑湖春好無人賦
夾岸桃花錦浪生

切響浮聲發巧深
研磨雖苦果何心
浪翁水樂無宮徵

自是雲山韶濩音

水樂次山事又其款乃曲云停撓靜聽曲中意好是雲山韶濩音

東野窮愁死不休
高天厚地一詩囚
江山萬古潮陽筆
合在元龍百尺樓

萬古幽人在澗阿
百年孤憤竟如何
無人說與天隨子

春草輸羸校幾多

天隨子詩無多藥草在南榮合有新苗次第生稗子不知名品上恐隨春

草闕
翰羸

謝客風容映古今
發源誰似柳州深
朱絃一拂遺音在
却是當年寂寞心

窘步相仍死不前
唱酬無復見前賢
縱橫正有凌雲筆
俯仰隨人亦可憐

竒外無竒更出竒
一波纔動萬波隨
只知詩到蘇黃盡
滄海橫流却是誰

曲學虛荒小說欺
俳諧怒罵豈宜時
今人合笑古人拙

除却雅言都不知

有情芍藥含春淚無力薔薇臥晚枝拈出退之山石句

始知渠是女郎詩

此詩論本
王中立

亂後玄都失故基看花詩在只堪悲劉郎也是人間客
枉向春風怨兔葵

金入洪鑪不厭頻精真那許受纖塵蘇門果有忠臣在
肯放坡詩百態新

百年纔覺古風迴元祐諸人次第來諱學金陵猶有說

竟將何罪廢歐梅

古雅難將子美親精純全失義山真論詩寧下涪翁拜
未作江西社裏人

池塘春草謝家春萬古千秋五字新傳語閉門陳正字
可憐無補費精神

撼樹蚍蜉自覺狂書生技癢愛論量老來留得詩千首
却被何人較短長

西園

百草千花雨氣新
今朝陌上有游塵
皇州春色濃於酒
醉殺西園歌舞人

杏花雜詩八首

杏花牆外一枝橫
半面宮妝出曉晴
看盡春風不回首
寶兒元自太憨生

露華浥浥汎晴光
睡足東風倚綠窓
試遣紅妝映銀燭
湘桃爭合伴仙郎

嫋嫋纖條映酒船
綠嬌紅小不勝憐
長年自笑情緣在

猶要春風慰眼前

暖日園林可散愁每逢花處儘遲留青旗知是誰家酒
一片春風出樹頭

紛紛紅紫不勝稠爭得春光競出頭却是梨花高一著
隨宜梳洗儘風流

露浥清華粉自添隔溪遙見玉廉幃眼看桃李飄零盡
更揀繁枝插帽簷

楚客離魂不易招野春平碧水迢迢垂楊也被多情惱

瘦損春風十萬條

紅妝翠蓋惜風流春動香生不自繇莫向芸齋厭閒冷

小詩供作錦纏頭

韓偓嚙三清之瑞露春動七情咀五色之靈芝香生九竅

出京

巫峽歸雲底處尋高城渺渺暮煙沈春風不翦垂楊斷
繫盡行人北望心

惠崇蘆鴈

寒沙折葦靜相依故國春風早晚歸意外羈棲誰畫得

羽毛單薄稻粱微

銅雀臺瓦硯

愛惜鉛華洗又看
畫闌桂樹雨聲寒
千年不作鴛鴦去
喚得書生笑老瞞

步虛詞三首

後二首三
鄉時作

閨苑仙人白錦袍
海山宮闕醉蟠桃
三更月底鸞聲急
萬里風頭鶴背高

萬神朝罷出通明
和氣歡聲滿玉京
見說人間有新異

綠章封事謝昇平

琪樹明霞碧落宮
歌音嫋嫋度冷風
人間聽得霓裳慣
猶恐鈞天是夢中

風雨停舟圖

老木高風作意狂
青山和雨入微茫
畫圖喚起扁舟夢
一夜江聲撼客牀

楊柳

楊柳青青溝水流
鴈兒調舌弄嬌柔
桃花記得題詩客

斜倚春風笑不休

梁縣道中

青山簇簇樹重重人在春雲浩蕩中也是杏花無意況
一枝臨水臥殘紅

長壽山居元夕

微茫燈火共荒村黃葉漫山雪擁門三十九年何限事
只留孤影伴黃昏

右司正之家渭川千畝圖

官街塵土霧中天入眼荒寒一灑然大似終南山下看
北風和雪卷蒼煙

山居二首

斜陽高樹挂晴虹肅肅微涼雨氣中一道鷺鷥花不斷
密香吹滿馬頭風

詩腸搜苦怯茶甌信手拈書却枕頭簷溜滴殘山院靜
碧花紅穗媚涼秋

寄女嚴

鶴崖魚窟路間關旬月無絲一往還寒食歸寧見隣女

舉家回首望西山

鶴崖魚窟在內鄉往盧氏道中

自鄧州幕府暫歸秋林

升斗微官不療饑中林春雨蕨芽肥歸來應被青山笑
可惜緇塵染素衣

題省掾劉德潤家驂鸞圖并為同舍郎劉長卿記
異劉在方城先有碧簫之遇如芙蓉城事云

千劫情緣萬古期樓中蕭史姓名非洞天花落秋雲冷

腸斷青鸞獨自飛

雜著三首

青蓋朝來帝座新
豈知衛瓘是忠臣
洛陽荊棘千年後
愁絕銅駝陌上人

天上河源地上流
黃金浮世等閒休
埋愁不著重泉底
儘向人間種白頭

半紙虛名百戰身
轉頭高塚臥麒麟
山間曾見漁樵說
辛苦凌煙閣上人

俳體雪香亭雜詠十二首

亭在故汴宮
仁安殿西

洛陽城闕變灰煙暮號朝虞只眼前為向杏梁雙燕道
營巢何處過明年

落日青山一片愁大河東注不還流若為長得熙春在
時上高層望宋州

醇和旁近洞房環碧瓦參差竹樹一作木閒批奏內人輪

上直去年名姓在窓間

醇和
殿名

天上三郎玉不如手中白羽趁花奴御屏零落宣和筆

留得華清按樂圖

詩仙詩鬼不謾欺時事先教夢裏知禁苑又經人物散

荒涼臺榭水流遲

十年前商帥國器方城夢
中得後二句為言如此

金縷歌詞金曲卮百年人事鬢成絲重來未必春風在
更為梨花住少時

楊柳隨風散綠絲桃花臨水弄妍姿無端種下青青竹
恰到湘君淚盡時

琵琶心事曲中論曾笑明妃負漢恩明日天山山下路

不須回首望都門

鑪薰浥浥帶輕陰
翠竹高梧水殿深
去去旃車雪三尺
畫羅休縷麝香金

附藝林伐山宋徽宗宮人多以麝香色為縷金
羅為衣裙元裕之詩北去穹廬千萬里畫羅休
縷麝香金

苦才多思是春風
偏近騷人悵望中
嘯盡杜鵑枝上血
海棠明日更應紅

暖日晴雲錦樹新風吹雨打旋成塵宮園深閉無人到
自在流鶯哭暮春

暮雲樓閣古今情地老天荒恨未平白髮纍臣幾人在
就中愁殺庾蘭成

附金詩紀事案遺山集中雪香亭雜咏共二十五
首乃金亡之後重過汴宮而作黍離之感觸
目興懷白髮纍臣自傷故國非為隔代咏也楊
用修以為宋徽宗事其亦昧於詩意矣

記夢

天上材官老不材從教兀兀走塵埃夢中望拜通明殿

曾見金書兩字來

戊子七月二十四日內鄉往盧氏宿走馬平夜夢拜天帝像遂觀法駕導

引畫幀最前負弩三人中有金書小字題裕之者夢中不自知其為予也

雜著二首

六朝瓊樹掌中春回首嚴妝一面新生羨石家金谷裏
千年獨有墜樓人

燕語顰鳥嘯百轉新長廊寂寂不逢人東君去作誰家客

花柳無情各自春

睂

石綠香煤淺淡間多情長帶楚梅酸
小詩擬寫春愁樣憶著分明下筆難

出都

春歸斜月曉聞鶯信馬都門半醉醒
官柳青青莫回首短長亭是斷腸亭

姨母隴西君諱日作

寶鏡煌煌照九州埋藏曾及見諸劉鄆城今日無雷煥

紫氣誰當辨斗牛

陽曲劉氏家大寶鏡能照天地四方以前知休咎其家埋地中人不待見

也明昌泰和中北方兵動渠父子欲卜之一日先以蓍幕障中庭乃扃閉門戶甚嚴及掘鏡出光耀爛然一室盡明如初日之照鏡中見北來兵騎穰穰無數餘三方都無所覩因大駭曰不可不可即埋之姨母時伏牀下得竊窺焉兵火後此家惟一兒子在姨母能指鏡處存否則不知也故予詩及之

自趙莊歸冠氏

杏園紅過雪披離楊柳無風綠綫齊寒食人家在原野
乳鴉牆外盡情啼

濟南雜詩五首

兒時曾過濟南城暗算存亡只自驚
四十二年彈指過却疑行處是前生

吳兒洲渚似神仙
罨畫溪光碧玉泉
別有洞天君不見
鵲山寒食泰和年

石刻燒殘讌集辭
雄樓傑觀想當時
只應畫戟清香地
多欠韋郎五字詩

白煙銷盡凍雲凝
山月飛來夜氣澄
且向波間看玉堦

不須橋畔覓金繩

荷葉荷花爛漫秋鷺鷥飛近釣魚舟北城佳處經行徧
留著南山更一遊

附元好問濟南行記予兒時從先隴城府君官
掖縣嘗過濟南然但能憶其大城府而已長大
來聞人談此州風物之美遊觀之富每以不得
一遊為恨歲乙未秋七月予來河朔者三年矣
始以故人李君輔之之故而得一至焉因次第

二十日間所遊歷為行記一篇傳之好事者初
至濟河約杜仲梁俱東並道諸山南與泰山即
是日以陰晦不克見至濟南輔之與同官權國
器置酒歷下亭故基此亭在府宅之後自周齊
以來有之苟近有亭曰環波鵲山北渚嵐漪水
香水西凝波狎鷗臺與橋同曰百花芙蓉堂曰
靜花軒曰名士水西亭之下湖曰大明其源出
於舜泉其大占城府三之一秋荷方盛紅綠如

繡令人渺然有吳兒洲渚之想大槩承平時濟
南樓觀天下莫與為比喪亂二十年唯有荆榛
瓦礫而已正如南都隆德故宮頽圯百年澗谿
草樹有荒寒古澹之趣雖高甍畫棟無復其舊
而天巧具在不待外飾而後奇也凡北渚亭所
見西北孤峯五曰匡山濟河路出其下世傳李
白嘗讀書於此曰栗山曰藥山以陽起石得名
曰鵲山山之民有云每歲七八月烏鵲集其上

亦有一山皆白鵲時此山之所以得名歟曰華
不注太白詩云昔歲遊歷下登華不注峯茲山
何峻秀青翠如芙蓉此真華峰寫照詩也大明
湖由北水門出與濟水合瀰漫無際遙望此山
如在水中蓋歷下城絕勝之處也華峯之東有
臥斗山正東百五十里鄒平之南有長白山范
文正公學舍在焉故又謂之黌堂嶺東十里有
南北兩妙山兩山之間有閔子騫墓西南大佛

頭嶺下有寺千佛山之西有函山長二十里所
山有九十谷泰山之北麓也泰山去城百里而
近特為函山所礙天晴登北渚則隱隱見之歷
山去城四五里許山有碑云其山修廣出材不
匱今但蕩然一丘耳西南少斷有蠟山由南山
而東則連亘千里與海山通矣爆流泉在城之
西南泉灤水源也山水匯於渴馬崖洑而不流
近城出而為此泉好事者曾以穀糠驗之信然

往時漫流纔沒脰故泉上湧高三尺許今漫流
為草木所壅深及尋丈故泉出水面纔二三寸
而已近世有太守改泉名檻泉又立檻泉坊取
詩義而言然土人呼爆流如故爆流字又作趵
突曾南豐云然金線泉有紋若金線夷猶池面
泉今為靈泉菴道士高生妙琴事人目為琴高
留予宿者再進士解飛卿好賢樂善歛曲周密
從予游者凡十許日說少日曾見所謂金線者

尚書安文國寶亦云以竹竿約水使不流尚或見之予與解徘徊泉上者三四日然竟不見也杜康泉今湮沒土人能指其處泉在舜祠廡下云杜康曾以此泉釀酒有取江中冷水與之較者中冷每升重二十四銖此泉減中冷一銖以之淪茗不減陸羽所第諸水云舜井二有歐公詩大字石刻甘露園紀歷下泉云夫濟遠矣初出河東王屋曰沆水注秦澤潛行地中復出共山

始曰濟故禹書曰道沅水東之逾溫逾墳城
入於河溢於滎汭於曹濮之門乃出於陶丘北
會於汶過歷下灤水之北遂東流且濟之為瀆
與江淮河等大而均尊獨濟水所行道障於太
行限於大河終能獨達於海不然則無以謂之
瀆矣江淮河行地上水性之常者也濟或汭於
地中水性之變者也予愛其論水之變與常有
當於予心者故并錄之珍珠泉今為張舍人園

亭二十年前吾希顏兄嘗有詩至泉上則知詩
為工矣凡濟南名泉七十有二爆流為上金線
次之珍珠又次之若玉環金虎黑虎柳絮皇華
無憂洗鉢及水晶簾非不佳然亦不能與三泉
侔矣此遊至爆流者六七宿靈泉菴者三汎大
明湖者再遂東入水柵柵之水名繡江發源長
白山下周圍三四十里府參佐張子鈞張飛卿
觴予繡江亭漾舟荷花中十餘里樂府皆京國

之舊劇談豪飲抵暮乃罷留五日而還道出王
舍人莊道旁一石刻云隋開皇丙午十二月鉉
珍墓誌珍巴郡武昌人學通三家優游田里以
壽卒誌丈鄙陋字以巴為已蓋周隋以來俗書
傳習之弊其云葬岫山之西者知西南小丘為
岫山也以歲計之隋開皇六年丙午至今甲午
碑石出壙中蓋十周天餘一大衍數也道南有
仁宗時侍從龍圖張侍郎挾讀書堂三字東坡

所書并范純粹律詩俱有石刻挾字叔文自題
仕宦之後每以王事至其家則必會鄉隣甥姪
盡醉極歡而罷各以歲月為識叔文有文譽仕
亦達然以榮利之故終身至其家三而已名宦
之役人如此可為一嘆也至濟南又留二日汎
大明待杜子不至明日行濟河道中小雨後泰
山峯嶺歷歷可數兩旁小山間見層出雲煙出
沒顧揖不暇恨無佳句為摹寫之耳前後所得

詩凡十五首并諸公唱酬附於左

題劉才卿湖石扇頭

幽澗雲凝雨未乾
曲池疎竹共荒寒
扇頭喚起西園夢
好似熙春閣下看

聞歌懷京師舊遊

樓前誰唱綠腰催
千里梁園首重回
記得杜家亭子上
信之欽用共聽來

出鎮州

汾水歸心日夜流孤雲飛處是松楸
無端行近還鄉路却傍西山入相州

南關二首

風裏秋蓬不自繇一生幾度過隆州
無情團栢關前水流盡朱顏到白頭

路轉川迴失繫舟更教兩驛過徐溝
多情團栢關前水

却共清汾一處流

是日自徐溝宿南關

馬坊冷大師清真道院

枯蒲折葦障清灣十里風荷指顧間
安得西湖展生手
亂鋪雲錦浸青山

遊天壇雜詩五首

芳樹陰陰鳥語譁綠雲晴雪映紅霞
青山可是堪人恨
藏著中巖十里花

漫山白白與紅紅小樹低叢看不供
總道植花香氣好

就中偏愛玉瓏鬆

花名有玉瓏鬆

溪童相對采椿芽指似陽坡說種瓜
想得

一作是

近山營

馬少青林深處有人家

湍聲洶洶落懸崖見說蛟龍擘石開安得天瓢一翻倒

躡雲平下看風雷

時旱甚故云

仙壇倒影鳳麟洲一道雲光插素秋也是天公閒不得
海東移著海西頭

初挈家還讀書山雜詩二首

天門筆勢到閒閒相國文章玉筍班從此晉陽方志上

繫舟山是讀書山

繫舟先大父讀書之所閒閒公改為元子讀書山又大參楊公叔玉謨先

人墓
銘

眼中華屋記生存舊事無人可共論
老樹婆娑三百尺
青衫還見讀書孫

賦瓶中雜花七首

予絕愛未開杏花故末篇自戲

老眼驚看節物新今年更與酒杯親
東山一道花如繡
從此他鄉不是春

香中人道睡香濃誰信丁香臭味同一樹
百枝千萬結
更應薰染費春工

生紅點點弄嬌妍
半拆花房更可憐
傳語春風好將護
莫教容易作銀錢

紅抹蘭膏綠染衣
綠嬌紅小兩相宜
華邊剩有清香在
木石癡兒自不知

素豔來從月姊家
溫風淑氣發清華
人閒自有交枝玉
天上休開六出花

昨日桃花錦片新
兔葵今日到殘春
低枝留得稀疏朶
比似全開更惱人

古銅瓶子滿芳枝裁翦春風入小詩
看看海棠如有語杏花也到退房時

杜生絕藝

杜生絕藝兩絃彈穆護沙詞不等閒
莫怪曲終雙淚落數聲全似古陽關

德華小女五歲能誦子詩數首以此詩為贈

牙牙嬌語總堪誇學念新詩似小茶
好箇通家女兄弟

海棠紅點紫蘭芽

唐人以茶為小女美稱

春歸

野杏溪桃三兩枝春歸也作送春詩東君自愛長安好
能住山城得幾時

發南樓度鴈門關二首

雞聲未動發南樓澗水隨人向北流欲望讀書山遠近
鴈門關上嬾回頭

稜嶒石磴倚高梯穹谷無人綠樹齊總為古來征戍苦
宿雲常傍塞垣低

自題中州集後五首

鄴下曹劉氣儘豪江東諸謝韻尤高
若從華實評詩品未便吳儂得錦袍

陶謝風流到百家半山老眼淨無花
北人不拾江西唾未要曾郎借齒牙

萬古騷人嘔肺肝乾坤清氣得來難
詩家亦有長沙帖莫作宣和閣本看

文章得失寸心知千古朱絃屬子期
愛一作恨殺溪南辛

老子相從何止十年遲

平世何曾有稗官
亂來史筆亦燒殘
百年遺藁天留在
抱向空山掩淚看

講武城

作計千年復萬年
似嫌蒸土不能堅
祇今講武人何在
衰柳殘楊有亂蟬

藥山道中

西風砧杵日相催
著破征衣整未迴
白鴈已銜霜信過

青林閒送雨聲來

黃華峪五首

岱崧王屋舊經過
自倚胸中勝槩多
獨欠太行高絕處
青天白日看山河

絕壁孤雲仔細看
雲間龍穴想高寒
碧瀾寸寸橫秋色
空對山靈說到難

唐人到難篇有碧瀾之下
寸寸秋色之句見文粹

玉立千峯畫不如
天公自有范寬圖
閭山要著黃花老
千尺珠簾得似無

前輩閭山詩有向使早逢周處士
子端應不號黃華之句處士指周先生

德
卿

團團石甕琢青瑤
仰面看雲覺動搖
誰著天瓢灑飛雨
半空翻轉玉龍腰

落峽飛流散不收
湍聲洶洶動高秋
也應嫌被紅塵浣
才近山門便泐流

鄉郡雜詩二首

予家自五代以後自汝州遷平定宋末又自平定遷於忻故文字中

以平定為鄉郡

一溝流水幾橋橫
岼上人家種柳成
來歲春風一千樹

綠煙和雨暗重城

新堂縹緲接飛樓雲錦周遭霜樹秋
若道使君無妙思
冠山移得近城頭

前高山雜詩

天池一雨洗氛埃全晉堂堂四望開
不上朝元峯北頂
真成不到此山來

楚山清曉圖

雨潤烟濃十二峯雲間合有楚王宮
遙知別後西州夢

一抹春愁淺淡中

三鄉雜詩二首

夢寐滄洲爛漫遊
西風安得釣魚舟
薄雲樓閣猶烘暑
細雨林塘已帶秋

尖新秋意晚晴中
六尺筇杖滿袖風
草舍斷橋通暗綠
竹搖殘照漏疎紅

榆社硤口村早發

瘦馬長途嬾著鞭
客懷牢落五更天
幾時不屬雞聲管

睡徹東窓日影偏

同兒輩賦未開海棠二首

翠葉輕籠豆顆勻
胭脂濃抹蠟痕新
殷勤留著花梢露
滴下生紅可惜春

枝間新綠一重重
小蕾深藏數點紅
愛惜芳心莫輕吐
且教桃李鬧春風

楊祕監馬圖

天閑誰省識真龍
金粟堆前草色空
忽見畫圖疑是夢

東華馳道麝香驄

岳山道中

野禾成穗石田黃
山木無風雨氣涼
流水平岡儘堪畫
數家村落更斜陽

雪岬鳴鶴

離離殘雪點荒叢
更著幽禽慘淡中
笑殺畫簾雙燕子
秋千紅索海棠風

客意

雪屋燈青客枕孤眼中了了見歸途山間兒女應相望
十月初旬得到無

論詩三首

坎井鳴鼃自一天江山放眼更超然情知春草池塘句
不到柴煙糞火邊

詩腸搜苦白頭生故紙塵昏枉乞靈不信驪珠不難得
試看金翅壁滄溟

暈碧裁紅點綴勻一回拈出一回新鴛鴦繡了從教看

莫把金針度與人

風柳鳴蟬

輕明雙翼曉風前一曲哀箏續斷絃移向別枝誰畫得
只留殘響客愁邊

僧寺阻雨

山氣森岑入葛衣砧聲偏與客心期僧窓連夜瀟瀟雨
又較歸程幾日遲

王子文琴齋

天上秋風月底霜
求凰一曲鬢絲長
相如四壁消何物
直要文君典鸛鷖

舊與趙景溫

浮雲流水易西東
回首梁園似夢中
一別十年今又別
酒罇能得幾回同

雪谷早行圖

卷中多國朝
名勝題詠

畫到天機古亦難
遺山詩境更高寒
貞元朝士今何在
莫厭明窓百過看

夜宿山中

月華人影共徘徊未算歸程夢已回
澗水悲鳴易愁絕
長松休送雨聲來

臺山雜詠五首

甲寅六月

西北天低五頂高
茫茫松海露靈鼇
泰山直上猶千里
井底殘山枉叫號

山上離宮魏故基
黃金佛閣到今疑
異時人讀清涼傳
應記諸孫賦黍離

一國春風帝子家
綠雲晴雪間紅霞
香繇穗藉僧鞵草
蜀錦驚看佛鉢花

沈沈龍穴貯雲煙
百草千花雨露偏
佛土休將人境比
誰家隨步得金蓮

靈蛇不與世相關
時復蜿蜒水石間
何處天瓢待霖雨
一龕香火梵仙山

乙卯二月二十一日歸自汴梁二十五日夜久旱
而雨偶記內鄉一詩追錄於此今三十年矣

桑條沾潤麥溝青
軋軋耕車鬧曉晴
老眼不隨花柳轉
一犁春事最關情

石勒問道圖

輕比韓彭作李陽
高僧久已笑君狂
中原果有劉文叔
肯說鈴聲替戾岡

貞燕

杏梁雙宿復雙飛
海國爭教隻影歸
想得秋風逼涼冷
謝家兒女亦依依

留贈丹陽王鍊師

敝盡貂裘白髮新
京華旅食記前身
仙翁相見休相笑
同是邯鄲枕上人

元夕

花影燈光一萬重
青衫驄馬踏東風
彰陽舊事無人記
二十三年似夢中

酴醾

枕幃餘韻最清真
夢裏猶來著莫人
擬借濃陰作羅幕

玉纓多處臥殘春

和德新丈

二年老眼暗兵塵今日逢君喜事新
結伴還鄉有成約不應先作北歸人

倦繡圖

香玉春來困不勝
曉鵲喚喚夢幾時磨可憐顯穎田家女
促織聲中對曉燈

雪谷曉行圖

漫漫長路幾時休風雪無情夢亦愁
羨殺田家老翁媪
瓦盆濁酒火鑪頭

與西僧倫伯達

行雲孤鶴萬緣輕遙見鄉關眼便明
不似遺山元老子
塵埃風雨過平生

御訂金詩增補中州集卷六十六